



Protocol da la radunanza cumünala dal cumün da Val Müstair

3. radunanza cumünala 2025, dals 26.11.2025, ad uras 20.00 illa sala da gimnastica a Sta. Maria

Preschaint:

- Presidenta: - Gabriella Binkert Becchetti
- Suprastants: - Jachen Armon Pitsch, vicepresidente
- Leonora Leu-Fallet
- Riet Scandella
- Chasper Stuppan
- Votants: - 44 (partecipaziun da 3.86 %)
- Giasts: - 2 persunas sainza dret da vuschar
(Heinz Hofstetter, contabel dal Center da sandà Val Müstair e
Julian Burger, nouv contabel dal Cumün da Val Müstair a partir dal 2027)
- S-chüsà: - Karin Casty-Greiner, Anita e Pierre René Grond, Arno Lamprecht (president cumischiun dal PEM) e Fadri Cazin
- Actuara: - Manuela Gross, manadra d'administraziun

1. Salüd / glista da tractandas

Presidenta Gabriella Binkert Becchetti driva la radunanza e spordscha il salüd a las 44 votantas e votants e'ls 2 giasts chi s'han radunats hoz illa sala da gimnastica a Sta. Maria, per la terza radunanza cumünala dal 2025. Il special e cordial bainvgnü spordscha ella a Manuela Gross-Oswald, chi ha quista saira la premiera sco nouva chanzlista e successura da Not Manatschal chi va pels 31.12.2025 in la meritada pensiun.

Avant sco inchaminar a l'evasiun da las tractandas exprima la presidenta ün grond grazia fich invers nos Suprem chi ha schanià a nos cumün da ruinas, lavinias ed otras catastrofas. Il fil da la vita suottastà al destin, uschè cha vain eir quist on, dals 27.11.2024 fin hoz, da tour cumgià da 23 convaschinas e convaschins. Quai sun, nomnadamaing davo la data dal mortori:

- | | |
|------------------------------|---------------------------|
| - Meyer Luciano | - Ruinatscha Erta |
| - Cafilisch-Vital Braida | - Oswald-Rest Margerita |
| - Toutsch Oswald | - Wetter-Thöni Hildegard |
| - Malgiaritta Werner | - Meyer-Fasser Carla |
| - Tschenett-Andri Margeritta | - Fliri Martin |
| - Rodigari Jgidio | - Schgör-Andri Margeritta |
| - Ruinatscha Renata | - Andri-Jung Liliana |
| - Salvett Severin | - Andri-Kofler Regina |
| - Fasser Gerard | - Malgiaritta Aurelia |
| - Tschiggfrei Anna | - Truttmann-Conrad Maria |
| - Prader Christian | - Ruinatscha Valeria |
| - Conrad Gertrude | |

Nus dschain ün cordial «adieu» ed ingrazchain a minchün chi ha laschà inavo seis stizis per nossa comunità. In algordanza ed in onur als trapassats s'alvaintan las votantas e'ls votants da las sopchas.

Da l'otra vart daja però eir nouva vita in Val, uschè cha nus pudain spordscher il bainvgnü a 10 uffants chi sun naschüts in quist temp, cun la spranza ch'eir la nouva generaziun chatta üna buna scoula, plazzas da giarsunadi e da lavur, cun bunas perspectivass per la vita futura in Val Müstair. Naschüdas / naschüts sun:

- | | |
|------------------|--------------------|
| - Althaus Amelie | - Bott Dario |
| - Fallet Nico | - Salutt Samuel |
| - Pitsch Tinet | - Grond Nevin |
| - Pircher Finn | - Hohenegger Nelio |
| - Pircher Eliah | - Tschenett Silas |

Glista da tractandas

La glista da tractandas d'eira publichada a temp illas tablas d'affischa da las fracziuns, sün nossa pagina d'internet e spedida sco fögl volant in mincha chasada. La bannida nu da andit a discussiuns e vain acconsentida sainza cuntravusch.

2. Tscherna dals scrutinadurs

Sco scrutinadur vegn proponü ed elet Daniel Pitsch.

3. Approvaziun dal protocol da la radunanza cumünala dals 03.06.2025

Tenor l'art. 29 da la constituziun cumünala sto il protocol da l'ultima radunanza, in quist cas quel da la radunanza cumünala dals 03.06.2025, gnir expost per l'invista dals votants almain ün mais davo la radunanza, d'ürant 30 dis, in chasa cumünala. L'exposiziun d'eira publichada illas tablas d'affischa da las singulas fracziuns. Recuors nu sun entrats, uschè cha'l protocol vala sco acceptà. La presidenta ingrazcha al chanzlist Not Manatschal per la fich buna e cumpetenta redacziun da seis ultim protocol da radunanza cumünala, da sia carriera pro'l Cumün da Val Müstair.

10 9 FINANZAS ED IMPOSTAS

Approvaziun dal preventiv dal Cumün da Val Müstair pel on 2026

La presidenta Gabriella Binkert Becchetti da prelecziun da seis rapport, chi vain surtut in fuorma d'extrat da protocol, cul seguaint cuntgnü:

La legislatura 2025 – 2028 ha cumanzà cun grond ingaschamaint. Cun la suprastanza redotta da set sün tschinch personas lavurain nus hoz plü efficiaint, calm e focussà sül tema. Al medem mumaint es la direcziun administrativa obliada da francar regularmaing las sezzüdas, surtour respunsabilità sün temas na politics ed uschè dar ün surleivg per la suprastanza, chi ha da's occupar dal andamaint strategic per nos cumün.

Nus vezzain ossa planet eir las lavurs inviadadas dals ultims ons - sco per exaimpel las sanaziuns da las vias obain il nouv condot d'aua da Sta Maria a Müstair, chi'd es gnü miss in funcziun avant ca. ün'eivna. Nu vuless repeter tuot quai chi sta scrit in detagl i'l preventiv 2026 chi'd es fich conservativ e precaut.

Il bött dal cumün es eir d'esser ün partenari important per la mansteranza locala, per l'industria, gastronomia ed agricultura, voul dir – per tuot las spartas, e per nossa populaziun.

Minchatant nu's vezza sün la prüm'ögliada il schmerdsch cha'l cumün generescha i'l preventiv o i'l rendaquint. Però per tschertas spartas da la mansteranza es quai da grond'importanza. Perquai es important, cha'l cumün obain il chantun investischan inavant pel bött da la populaziun e bain cler eir per nossa mansteranza. Il turissem sto generar daplü giasts e sportas ed uschè augmantar la valor agiuntada locala e regionala. Quatras less eu ingrazchar a tuots per la fich buna e professiunala collavuraziun cun tuot la mansteranza da la Val Müstair.

La suprastanza ha repassà duos jadas il preventiv, insembel cun noss respunsabels da mincha sparta, davo eir cun la cumischion sindicatoria. La suprastanza til ha acconsenti illa sezzüda dals 28.10.2025, a man da la radunanza cumünala da quista saira. Fich infuormativ es adüna eir il discuors culs respunsabels dal uffizi da cumüns dal Chantun Grischun, cun sar Thomas Kollegger. Nus vain gnü visita dal successur da Giachen Caduff, sar Michael Sutz. El es svesch stat chanzlist cumünal ed es ün grond support da nouva generaziun per nos cumün. Els perseguiteschan adüna cun grond interess nossas radunanzas, decisiuns e l'andamaint da nos cumün e legian mincha mais eir nos Mas-chalch chi'd es tenor els ün mez fich comunicativ ed infuormativ in congual cun oters mezs d'infuormaziun d'oters cumüns in nos chantun.

In seguit preschainta il contabel Jan Ruinatscha il preventiv 2026. Il preventiv muossa il seguaint resultat:

Quint da success

Entradas	fr.	15'446'500.00
Sortidas	fr.	<u>15'492'750.00</u>
Deficit entradas	fr.	46'250.00

Quint d'investiziun

Entradas	fr.	2'658'900.00
Sortidas	fr.	<u>7'008'000.00</u>
Investiziuns nettas	fr.	4'349'100.00

Aigna finanziaziun (Cashflow) fr. 944'400.00

Deficit da finanziaziun fr. 3'404'700.00

Discussiun:

- Aldo Pitsch declera cha nus vain trais differentas zonas i'l parc da natüra regiunal, resp. i'l reservat UNESCO Biosfera Engiadina Val Müstair: zona centrala, zona da chüra e zona da svilup e manzuna eir l'importanza centrala da la zona da svilup per la Val Müstair e las pusibilitats illa zona da svilup: *In der Entwicklungszone sind die meisten Nutzungsformen erlaubt. Sie dient der Förderung einer soziokulturell und ökologisch nachhaltigen wirtschaftlichen und menschlichen Entwicklung und erfüllt somit eine zentrale Funktion bei der Zusammenarbeit von örtlichen Gemeinschaften, Wissenschaftlern und anderen Akteuren in Untersuchungen zur Nachhaltigkeit.* Eir il "BAFU" til ha confermà per scrit l'existenza da la zona da svilup illa Biosfera Val Müstair in quala as rechatta eir il proget da La Sassa. Tenor el nu vegn acceptà quista zona dal parc da natüra Biosfera Val Müstair e quai nun es per el acceptabel. L'import da fr. 200'000.- sco eir fr. 40'000.- pel svilup da la sporta cha'l cumün ha resguardà i'l preventiv 2026 pel parc da natüra Biosfera Val Müstair til para schmasürà e tenor el bastess da contribuir a la Biosfera ün import da fr. 40'000.- fin fr. 50'000.- sco üsità in oters parcs da natüra.
- La presidenta declera cha la nouva campagna d'inviern per la destinaziun es gnüda creada da l'organisaziun da turissem resp. da la DMO e chi exista üna tsherta confusiun, perquai cha'l logo da la reclama turistica as nomna « Biosfera Val Müstair ». La DMO metta l'inter inviern sün reclama conscianta pel territori da skis Minschuns e'l parc da natüra fa part dal reservat da biosfera UNESCO Biosfera Engiadina Val Müstair. Ella manzuna eir il punct fulminant per Minschuns chi po festagiar il giubileum da 50 ons. Implü conferma ella l'existenza da la zona da svilup i'l reservat da biosfera UNESCO Biosfera Engiadina Val Müstair.
- David Spinnler declera cha quist sia fingià gnü discutà plüssas jadas. El conferma amo üna jada cha la Biosfera nu s'ha mai externada cunter il proget da Minschuns e giavüscha amo üna jada da schmetter cun quists rimprovers chi's repetan adüna darcheu. El suottastrichà eir l'importanza dal sustegn dal cumün per realisar ils progets previs illa perioda da program 2025 – 2028, chi pon render accessibel ulteriuras funtanas, grazcha als raps deliberats.

Decisiun:

Cun 43 vuschs da schi ed 1 abstenziun accepta la radunanza il preventiv dal Cumün da Val Müstair pel on 2026, illa fuorma preschantada.

La presidenta ingrazcha pel votum e per la fiduzcha demuossada. Implü ingrazcha ella al manader da finanzas, a Jan Ruinatscha, per sia buna e gronda lavur. Grazia disch ella eir a tuot las collavuraturas e'ls collavuratur dal Cumün da Val Müstair, a las cumischiuns, ed a la suprastanta e'ls suprastants per lur grond ingaschamaint a böñ dal cumün.

11 9.00 IMPOSTAS CUMÜNALAS

Fixaziun dal pè d'impostas pel on 2026

Tenor l'artichel 35 da la constituziun cumünala sto l'otezza dal pè d'impostas gnir confermada d'on in on tras la radunanza cumünala. In vista a las investiziuns chi stan davant porta, e'l deficit da finanziaziun büdschetà, propuona la suprastanza cumünala da laschar il pè d'impostas sün la valur actuala, v.d. süls 120 % da l'imposta chantunala simpla.

La radunanza segua cun **unanimità** a quist votum e conferma il pè d'impostas pel on 2026 culs 120 % da l'imposta chantunala simpla.

12 4.00 OSPIDALS

Approvaziun dal preventiv dal Center da sandà Val Müstair pel on 2026

La presidenta conferma l'importanza dal center da sandà, chi'd es - in congual culs debakels in otras regiuns - üna buna e predschada pozza per nossa populaziun indigena. Ma eir pro nus sun las sfidas grondas e nus stuvain esser precaut cun nossas pussibilitats per nossa pitschna val-lada.

Judith Fasser, administratura dal Center da sandà Val Müstair, preschainta in seguit cun diversas graficas il preventiv per la gestiun dal 2026. Il resultat tuna:

- Entradas da fr. 10'888'103.00 (2025 = fr. 10'773'075.00)
- Sortidas da fr. 11'168'900.00 (2025 = fr. 11'443'958.00)
- Deficit fr. 280'797.00 (2025 = - fr. 187'435.00 davo la prelevaziun dal chapital d'organisaziun)

Pro posiziuns chi divergeschan cun quellas dal on passà da ella las infuormaziuns da detagl. Implü infuorma Judith Fasser sur:

Andamaint dal on curraint:

- ospidal – reduenziun dals cas staziunaris – suot la media dals ultims ons
- pratcha – frequentada plü pac suvent co l'on passà – eir damain consultaziuns da Tuer perquai cha agens medis sun gnüts nanpro i'l Vnuost.
- spitex – pitschen augmoint pro las uras da fliamaint, reduenziun pro las uras da chasada ed accumpognamaint.
- chasa da chüra – occupaziun da lets chi cuntainta, però il s-chalin da chüra plü bass
- servezzan da salvamaint – damain cas co dal on 2024, però in media dals ons avant.

Sguard i'l avegnir:

- ambiaint mal quiet
- chüra: magari consequenzas pro l'occupaziun tras il müdamaint i'l Engiadin'Ota
- introduenziun d'ün nouv catalog naziunal per la pratcha – consequenzas finanzialas – focus sün meidis specialisats
- chattar buna successiun - meidis, fliamaint

La presidenta conferma cha la suprastanza ha acconsenti il preventiv a chaschun da la sezzüda dals 20.10.2025 e propuona l'acconsentimaint, cun ün grazcha fich a Judith Fasser, a la squadra dals meidis, a tuot il team dal CSVm plü la cumischiun per la lavur prestada.

Discussiun:

- Mario Gross-Vollenweider dumonda perche cha uschè bleras duonnas jauras han desdit, ils ultims ons, lur piazza da lavur pro'l CSVm.

- Judith Fasser declera cha l'ultima duonna ha lavurà bundant 24 ons pro'l CSVN ed as varà vulgü orientar nouv avant la pensiun.
- Mario Gross-Vollenweider ingrazcha al CSVN per la buna lavur e l'ingaschaint e deplorescha las bleras desdittas da personas indigenas.

Decisiun:

Cun **unanimità** accepta la radunanza il preventiv dal Center da sandà Val Müstair pel on 2026.

13 8.60 PRODUCZIUN D'ENERGIA

Approvaziun dal preventiv dal PEM pel on 2026

Introduttiv manzuna la presidenta cha'l PEM as rechatta uossa illa fasa da grondas investiziuns per esser üna buna pozza per nos futur.

In seguit preschainta il manader dal PEM, Enrico Tschenett, il preventiv 2026 chi prevezza:

- sortidas da fr. 4'534'100.00
- entradas da fr. 4'579'000.00
- avanz da fr. 44'900.00

Implü da Enrico infuormaziuns sur dals progets d'investiziun, cuosts da rait, cuosts da la cumprita d'energia sül marchà, rechav da la vendita sül marchà e la structura da las tariffas.

La presidenta conferma cha la suprastanza ha acconsenti il preventiv a chaschun da la sezzüda dals 20.10.2025 e propuona l'acconsentimaint. Ella ingrazcha al manader dal PEM sco eir a tuot ils collavurats/-as ed a la cumischion per la gronda lavur prestada.

Discussiun:

- Aita Stupan ha üna dumonda regard ils ots pizs manzunats dal manader dal PEM - che es la problematica.
- Enrico Tschenett declera cha'ls ots pizs chaschunan d'üna vart cuosts enorms al PEM, scha'l consüment ha ün ot consüm d'energia, sco p.ex. la saira cun dovrar plüs apparats electrici chi douvran blera forza. Da l'otra vart vain il problem d'ürant ün di cun bler sulai, cur cha vain üna surproducziun d'energia solara chi chaschuna dons vi dals implants dal PEM e perquai stuvevan ils indrizs gnir serrats giò d'ürant la stà, cur cha vain massa bler sulai e massa blera producziun d'energia solara, cun quai cha battarias grondas nu sun amo svilupadas uschè inavant.
Per promover al cliaint da spargnar es gnü s-chaffi la cumponenta da prestaziun chi crea impuls per evitar o per spostar ils pizs da chargia. Per diminuir ils pizs da l'energia solara vegn examinà la realisabilità d'ün grond arcun da battarias.
- Mario Gross-Vollenweider dumonda scha la tariffa redotta per la pompa da chalur nun exista plü.
- Enrico Tschenett conferma quai.
- Albin Prevost ha vis las otas investiziuns cha'l PEM ha da far pro'l trafo da colliaziun our il cunfin e dumonda co cha nus profitain da quist'investiziun e scha dovrain quella lingia be schi vess d'ir ruot la lingia sur il Pass dal Fuorn.
- Enrico declera cha per intant nu vain nus ingün plan B. Scha la rait sur il Pass dal Fuorn vess d'ir ruotta tras lavinas, boudas etc. exista ün pitschen attach d'urgenza our il cunfin, chi furniss però be electricità per la fracziun da Müstair. Fin hoz nun es quai mai stat il cas, però pro üna ruottadüra füss actualmaing pussibel cha la Val Müstair füss plü lung sainza electricità, voul dir, fin cha la ruottadüra vegn chattada e reparada.
- La presidenta manzuna l'importanza da mezs per arcunar electricità. Perquai fa il cumün tuot il pussibel per domiciliar a la ditta Lynus, chi construiss ün lö da producziun per investir i'l sector da battarias grondas sco eir i'l svilup da la software.
Id es eir ün fat cha nus vain gnü duos voutas ün'interrupziun da l'electricità plü gronda, üna

jada d'urant la stagiun ota, cur cha l'administraziun es statta salda ed hotels etc. han gnü dons vi dals agens indrizs. Perquai esa important in quist mumaint, da pudair furnir svelte e sgür electricità da l'Italia.

Decisiun:

Cun **unanimità** accepta la radunanza il preventiv dal PEM pel on 2026.

14 8.40 BIOSFERA - ORGANISAZIUN

Approvaziun dal preventiv da la Biosfera Val Müstair pel on 2026

La presidenta manzuna cha la Biosfera Val Müstair ha cumanzà culs progets 2025 – 2028 e cha'l parc da natüra es üna part importanta dal reservat da biosfera UNESCO Biosfera Engiadina Val Müstair.

In seguit preschainta David Spinner, manader da gestiun da la Biosfera, il preventiv. Quel muossa entradas ed expensas in l'import da fr. 2'236'515.47. Implü preschainta David üna survista detagliada sco cha quist import vegn scumparti süls differents secturs, voul dir:

- Mantegniment e metter in valur la qualità da natüra e cuntrada	fr.	631'997.00
- Rinforzar ün'economia perdüraivla	fr.	623'564.00
- Sensibilisar per dumondas dal ambiaint	fr.	377'498.00
- Management, sgürar il spazi e la comunicaziun	fr.	431'498.00
- Perscrutaziun	fr.	<u>171'957.00</u>
Total	fr.	2'236'515.00

La presidenta cumünala conferma eir in quist cas cha la suprastanza ha acconsenti il preventiv a chaschun da la sezzüda dals 20.10.2025 e propuona l'acconsentiment, cun ün grazcha fich a David Spinner, al team da la Biosfera ed a la cumischiun per la lavur prestada.

Decisiun:

Sainza far adöver da la discussiun accepta la radunanza cun **unanimità** il preventiv da la Biosfera Val Müstair pel on 2026.

15 1.00 REGISTER FUNDIARI

Approvaziun da la convegno cun la Regiun Engiadina Bassa / Val Müstair per la gestiun da l'uffizi dal cudesch fundiari, per la perioda 2026 - 2030

Introducziun da la presidenta:

Fin l'on 2024 faivan part ils cumüns Scuol, Zernez, Valsot e la Val Müstair il uffizi dal cudesch fundiari Engiadina Bassa/Val Müstair regiunal. Samignun vaiva amo sves üna impiegà chi manava l'uffizi dal cudesch fundiari da Samignun. Davo cha'l collavuratur da Samignun es it in pensiun han eir els decis da surdar la gestiun a la regiun. Causa il cas da Samignun d'eira fin hoz da manar duos manaschis parallels, voul dir la contabilità, la cumischiun sindicatoria e la revisiun. Quist nu fa però ingün segn ed in avuost 2025 es gnüda transferida la contabilità dal cudesch fundiari dal Samignun il manaschi da la regiun. La regiun vaiva amo capacità e po lavurar uschè plü efficiaint.

In quist ultim pass dess uossa gnir abolida la veglia convegno ed approvada la nova convegno cun l'integraziun dal cumün da Samignun illa regiun. Il scumpart da clav dals guadogns dal cudesch fundiari Engiadina Bassa/Val Müstair resta sco fin uossa.

La nova convegno dess gnir stipulada per la dürada da 5 ons, voul dir dals 01.01.2026 fin als 31.12.2030.

Decisiun:

Cun **unanimità** acceptan ils preschaints la convegno cun la Regiun Engiadina Bass / Val Müstair per la gestiun da l'uffizi dal cudesch fundiari, per la dürada da 5 ons, voul dir fin als 31.12.2030.

10. Varia

Infuormaziuns da la presidenta:

Minschuns / La Sassa

Il cumün ha surgni la fich buna nouva davart dal güdisch superiur dal chantun Grischun in connex cul proget cumünaivel per la Sassa / Minschuns e la pendiculara. Daspö il 2019 es pendent ün recuors pro'l uffizi federal dal trafic da las organisaziuns cunter la pendiculara. Dürant ils ultims ons sun stat adattamaints federals, ed insembel cun Minschuns e La Sassa vain nus actualisà tuot la documainta dumandada e quella es uossa in viadi vers Berna. Davo chattarà lö davart dal uffizi da trafic üna consultaziun interna e nus spettain sün la resposta definitiva – voul dir per la concessiun – chi rivarà scha tuot va bain d'ürant il prüm o seguond quartal dal on 2026. Nus eschan da buna speranza e sperain, pel manaschi da Minschuns, sün blera naiv ed ün bun inviern.

Sviamaint Sta. Maria Val Müstair

Pel sviamaint da Sta. Maria es uossa tuot plü cler cun quai ch'el es gnü acceptà dal uffizi federal dal territori (ARE). Il chantun Grischun es vi dal lavurar oura ün proget concret, cun prümas provas ed expertisas da geologia, pel tunnel chi maina suot la Muranzina. In quist connex ingrazcha la presidenta als partecipants dal discuors cumünal. Quel es stat fich interessant e dess gnir fat eir in avegnir. Davo passa 40 ons eschan nus sün üna buna via e quai fa grond plaschair.

Adieu Not – üna persuna speciala va in sia meritada pensiun

Daspö 38 ons es Not Manatschal i'l servezzan pel cumün. Sco prüm pro'l Cumün da Sta. Maria e davo la fusiun sco chanzlist e manader da l'administraziun dal nouv Cumün da Val Müstair.

Cun Not ha la presidenta persunalmaing üna fich lunga e stretta via. Cumanzà ha tuot i'l büro da la ditta HOPPE AG ingio cha Not d'eira "Unterstift" da la presidenta. Fingià da quella jada ha Not schoglia cun calma e cun pragmatismem ils problems e lavurà cun grond ingaschamaint e fich efficiaint.

Davo quist seguond giarsunadi ha el lavurà sco chanzlist pro'l cumün da Sta. Maria. Not ha schon quella jada gnü grond pisser da Seis cumün Sta. Maria. Cura cha la presidenta ha tscherchà üna pitschna chasa, ha el miss ün bun pled pro'l uffizi social chi ha lura vendü la chasa ad ella e na ad üna persuna d'utrò. Cun Not ha la presidenta - ed ella pensa eir tuot la populaziun - adüna gnü ün grond agüd per mincha problem ed ün grond sustegn per l'administraziun cumünala.

Davo la fusiun es el stat dal prüm davent il motor per stipular ils novs reglamaints, ledschas e.o.pl. e scha la presidenta conguala cun oters cumüns illa regiun, d'eira la Val Müstair exemplarica. Not ha quel umur süt, ma el es eir üna persuna da buna e d'allegraivla cumpagnia. Eir scha minchatant seis collegas dal Forum fan schnöss in connex cul sulai stupend da la fracziun da Sta. Maria, ha Not adüna pront üna varianta positiva per cuntradir a seis collegas.

El ha adüna gnü üna lingia gualiva, correcta ed onesta. Quist sun attributs chi vaglian adüna daplü e la presidenta pensa cha per mincha president cha Not ha gnü, es el adüna stat lojal, cun respet, integher ed üna gronda pozza, chi ha adüna valütà e defais ils interess da nos cumün.

Ossa va üna lunga era planet a fin. Not va a la fin dal on 2025 in sia meritada pensiun ed a nus tuots resta cun grond plaschair d'ingrazchar ad el per tuot quai ch'el ha prestà pel bön da nos cumün.

Nus giavüschain bler plaschair, buna sandà e bleras bellas uras cun Tia duonna Prisca e Teis abiadi Leonardo, ma eir cun tuot Tia famiglia. Nus restaran adüna collià cun üna cordiala memoria per Tai e nus s'allegrain minchatant eir sün Tia visita adüna bainvissa pro nus i'l Forum. Üna buna tschaina giodynamo davo la prosma sezzüda da suprastanza. Not, amo üna jada ün ston grazia fichun e tuot il bun. Ils preschaints ingrazchan a Not cun ün grond applaus.

Eir Not disch ün pèr pèds, uschè surtut pel protocol:

“Eu ingrazch a la suprastanza ed impustüt a la presidenta, a Gabriella, per la fich buna collavuraziun e per la fiduzcha demuossada invers mia persuna. Id ha fat plaschair da collavurar in quist möd a bön da nos cumün. Ingrazchar vuless eu eir a las suprastantas e'ls suprastants cun lur presidents, culs quals eu n'ha pudü collavurar d'ürant meis 38 ons d'uffizi. Displaschaivelmaing nu sun divers d'els plü tanter da nus. Dir grazcha vuless eu eir a Vus, stimadas votantas e votants,

sco organ superiur dal cumün, per la fiduzcha demuossada invers mia persuna. Eu n'ha adüna gnü grond plaschair da pudair lavurar sco chanzlist da nos bel Cumün da Val Müstair.

A mia successura, a Manuela Gross, giavüsche eu bler plaschair e blera satisfacziun pro la lavur sco nouva chanzlista dal Cumün da Val Müstair.

Grazia fich. In quist sen giavüsche eu a Vus ed a Voss confamigliars ün bel e paschaivel temp d'Advent.

Not Manatschal

Varia, votums our da la radunanza:

- Mario Gross-Vollenweider plascha fich bain l'armonia chi regna in suprastanza.
- Il president dals tregants Chalavaina Curdin Bott ingrazcha pel invid e s'allegra per far eviva sül success cha'ls tregants sportivs Chalavaina Val Müstair han gnü in general quist on e per la terza piazza al champiunadi svizzer a Thun. El loda il grond program ch'els han fat ils ultims trais ons e chi'd es gnü realisà cun agüd, a plaina cuntantezza e sainza accidaints. El ingrazcha a tuot ils voluntaris per las bleras uras prestadas, als sponsurs pel sustegn generus ed al cumün per la buna collavuraziun. El s'alorda ed ingrazcha eir dal camarad trapassà Gerard Fasser, chi ha prestà bler pels tregants e l'implant da tir. Curdin giavüscha a tuots ün paschaivel temp d'Advent e bellas Festas da Nadal.
- Reto Roussette sta a cour l'andamaint dal ospidal a Samedan e dumonda scha'l cumün e'l Center da sandà Val Müstair s'han fingià fat impissamaints e scha'l Center da sandà Val Müstair ha cunvegna cun l'ospidal a Samedan.
- La presidenta declera cha'l Cumün da Val Müstair e'l Center da sandà Val Müstair nun ha da dir alch in quist regard e manzuna cha'l tema sandà es per intant il tema nr. 1. Dal ospidal a Samedan nu vain nus eir na daplü infuormaziuns e la fundaziun dal provedimaint da sandà d'Engiadin'Ota sto uossa gnir cun propostas invers ils cumüns da l'Engiadin'Ota.
- Judith Fasser conferma quai e declera cha'l CSVM nun ha ingünas cunvegna cun l'ospidal a Samedan.
- Il grond cusglier Rico Lamprecht piglia il pled e declera cha'l tema sandà es eir ün grond tema da la regenza e cha la Val Müstair e'l Center da sandà Val Müstair, cun sia structura, nun han ingüns problems.

Pled final da la presidenta:

La presidenta ingrazcha a tuots per la cumparsa, la discussiun e per l'interess demuossà vi da la lavur politica per la Val Müstair. Ella ingrazcha eir a Beat per las grondas fadias per drizzar aint la sala per quista saira.

In seguit invida la presidenta pel aperitiv preparà da Caterina Bott per festagiar la grondiusa prestaziun da noss tregants sportivs Chalavaina Val Müstair al champiunadi svizzer a Thun. Ella giavüscha a tuots ün fich bel temp d'Advent, üna bella Festa da Nadal ed ün bun di bun on.

Finischun da la part ufficiala ad uras 22.10.

La presidenta:

L'actua:

.....
Gabriella Binkert Becchetti

.....
Manuela Gross